

Persvader che la lavur è fitg multifara

Hotelleriesuisse Grischun: Acziun «per plaschair disturbar»

DA GION NUTEGN STGIER / ANR

■ **Per in di avran 15 hotels da noss chantun lur portas per la publicitad. Vegl e giuven han quel di chaschun da guardar a directurs, cuschiniers, cameriers e mattas da chombras sur ils givels. Cun quella acziun vulan ils hoteliers persvader tuts che la lavur en in hotel è multifara ed interessanta.** En il Grischun è la gastronomia ina da las pigtas fermas da l'economia e dal turissem. Tuttina cumbatta quella bransch adina puspè per ses maletg e quai cunzunt er tar la populaziun indigena. Vitiers vegn che blers renfatschan ch'il persunal saja betg uschè gentil sco per exempel en ils hotels en l'Austria ed en il Tiroil dal sid. Ina autra realitad è che mats e mattas prefereschon da far in auter emprendissadi che da cuschinier ubain da cameriera. Cun l'acziun «per plaschair disturbar» vulan ils hoteliers grischuns mussar a geniturs e lur uffants che la lavur en in hotel è senz'uter multifara e schizunt plain tensiun. Mussar ins vul er che lavur en la gastronomia è bain ina professiun nua ch'igl è pussaivel da vegnir en contact cun blera gieud, dentant er da far blers plaschairs a vegl e giuven.

Da l'hotel da tschintg stailas fin tar la scola d'hotel

Ils 19 da mars 2017 da las 11.00 fin a las 17.00 avran en Svizra 120 hotels lur portas per la populaziun indigena ed er per lur giasts. *Jürg Domenig*, il mainagestium

da Hotelleriesuisse Grischun, è sa mussà ventiraivel che er 15 hotels grischuns sa participeschon a l'acziun naziunala.

Mintg'onn termineschon en noss chantun 300 mattas e mats lur emprendissadi fatg en in hotel ubain en in restaurant.

Cun l'acziun «per plaschair disturbar» vulan ils iniziants ed ils hoteliers er dar als emprendists ed a las emprendistas ina

plattafurma da vegnir pli manaivel a giasts e visitaders. Ils giuvenils vegnan en ina moda fitg persunala a raquintar da lur aventuras en l'hotel ubain en lur emprendissadi. En la gronda part dals 15 hotels che avran dumengia proxima lur portas per ritg e pauper vegnan ils emprendists e las emprendistas ad esser ils protagonisti e las protagonistas per sis uras cun star en il center da l'occurrenza.



In da quels hotels che avr dumengia proxima las portas per mintgin è il Badrutt's Palace a San Murezzan.

MAD

Portas avertas en hotels grischuns

Badrutt's Palace Hotel, San Murezzan
 Hotel Schweizerhof, Lai
 Ameron Swiss Mountain Hotel, Tavau
 Hotel Adula, Flem-Waldhaus
 Nira Alpina, Silvaplauna
 Hotel Restaurant Lej da Staz, San Murezzan
 Signina Hotel, Laax
 Hotel Waldhaus, Segl
 Hotel da Muntogna Randolins, San Murezzan
 Tschuggen Grand Hotel, Arosa
 Scola da Turissem e Hotellaria, Passugg
 Valbella Inn Resort, Lai
 Arosa Kulm Hotel ed Alpin Spa, Arosa
 City West Hotel, Cuira
 Hotel Guarda Val, Lai